



# HIMAGSIK

Rebolusyonaryong Pahayagan ng Gitnang Luzon

Taon XXVIII Blg. 6

REGULAR NA ISYU

Setyembre-Oktubre 2002

## Labanan at Biguin ang Agresyong US at ang Todong kontra-rebolusyonaryong Digma ng Rehimeng Macapagal-Arroyo!

**S**etyembre 16, 1991, matagumpay na napatalsik ng mamamayang Pilipino ang mga base militar ng US sa bansa. Ang makapangyarihang tinig ng malawak na anti-imperyalistang hanay ay nakaimpluwensya nang malaki sa senado para ibasura ang ekstensyon ng pananatili ng mga base militar ng Kano sa bansa. Makalipas ang labing isang taon, buong kalapastanganang ibinukas muli ng rehimeng Macapagal-Arroyo sa mga sundalong Kano hindi lamang ang mga dating base-militar kundi ang buong bansa bilang lunsaran ng digmang agresyon ng US.

Walang humpay si Macapagal-Arroyo sa paggigiit na mapanatili sa bansa ang mga tropa ng US sa pamamagitan ng mga sunud-sunod na pagsasanay ng mga sundalong Amerikano rito tulad ng mga serye ng Balikatan War Exercises. Masigasig niyang isinusulong ang Mutual Logistics Support Agreement (MLSA) upang bigyang-daan ang malayang paggamit ng tropang Amerikano sa lahat ng pasilidad ng Pilipinas para sa panghihimasok at panggegera nito sa bansa at iba pang mga karatig na bayan.

Nauna pa, isa si Macapagal-Arroyo sa pinakamasigasig na nagpasa sa Visiting Forces Agreement (VFA), ang batas na nagpahintulot muli sa malayang paglalabas-masok dito ng mga tropa ng US. Ngayon ay pinakamasugid ito sa pagsuporta sa mga pang-uupat ng gera ng imperyalismong US sa diwa ng “digmang kontra-terorismo” ng naghuhuramentadong si George W. Bush.

Labis na pangangayupapa si Macapagal-Arroyo sa among imperyalismong US bunsod ng pagkukumahog nitong makakuha ng

ayuda para tukuran ang naghihinalang ekonomya, suportang militar para ibuwelo ang todong kontra-rebolusyonaryong digma, at suportang pampulitika laluna para sa kanyang balak na pagtakbo bilang presidente sa 2004.

Sa maikling panahon sa poder, inabot na ng rehimeng Macapagal-Arroyo ang grabeng pagkakahiwalay sa mamamayan sanhi ng di maampat na pagbulusok ng ekonomya, matinding kahirapan at





kagutuman, malubhang inhustisya at paglabag sa karapatang-tao, malaganap na krimen, matinding bangayan sa pulitika ng iba't ibang reaksyunaryong bloke, at garapalang korupsiyon sa gubyrno.

Upang pagtakpan ang sariling kapalpakan, ipinasa ni Macapagal-Arroyo ang sisi sa mga rebolusyonaryong pwersa bilang sagabal sa pag-unlad. Sa udyok ng US, binansagan niyang terorista ang Partido Komunista ng Pilipinas (PKP), Bagong Hukbong Bayan (BHB) at buong rebolusyonaryong kilusan. Tinalikuran niya ang usapang pangkapayapaan at nagdeklara ng todong digma laban sa rebolusyonaryong kilusan.

Ang todong digma ng rehimeng Macapagal-Arroyo ay lalo lamang magpapasidhi ng pagkamuhi sa kanya ng mamamayan. Sasagarin nito ang rekurso ng gubyrno na magbubulid sa higit pang malalim na krisis, samantalang ibinubuyo nito ang reaksyunaryong militar sa walang habas na paglabag sa karapatang-tao.

Ang ganitong kalagayan ay nagbibigay ng napakagandang oportunidad sa rebolusyonaryong kilusan upang ibayo pang makapagpalakas. Ang napopoot na mamamayan ay kailangang pukawin, organisahin at itransporma bilang mga solidong pwersa ng rebolusyon. Kailangan ding buuin ang malapad na patriyotikong nagkakaisang prente laban sa patuloy na presensya ng mga tropang Amerikano at mga patakaran ng imperyalismong US.

Kailangang patuloy na paigtingin ang pakikidigmang gerilya. Maglunsad ng mga taktikal na

opensiba sa pinakamaraming lugar. Tuluy-tuloy na maglunsad ng mga pakikibakang agraryo at masikhay na buuin at palakasin ang mga rebolusyonaryong organisasyong masa.

May napakahalagang papel ang masa sa ikatatagumpay ng mga taktikal na opensiba ng hukbong bayan sa isang banda, at sa ikabibigo ng kontra-rebolusyonaryong digma ng pasistang tropa sa isang banda. Ang mahigpit na ugnay sa kanila ang nagpapatalas ng pandama ng BHB hinggil sa plano at kilos ng kaaway. Sa tulong din ng masa ay nagiging bulag at bingi ang reaksyunaryong militar hinggil sa mga kilos ng mga Pulang Mandirigma.

Buo ang determinasyon ng lahat ng rebolusyonaryong pwersa na ipagtanggol at ibayo pang isulong ang mga tagumpay na nakamit sa rebolusyonaryong pakikibaka sa lahat ng larangan. Nakahanda ang buong rebolusyonaryong kilusan sa pamumuno ng PKP na harapin, labanan at biguin ang todong kontra-rebolusyonaryong digma ng rehimeng Macapagal-Arroyo at ang nakaambang digmang agresyon ng US. *H*

#### **LAMAN NG ISYU NGAYON**

**1** Editorial: LABANAN AT BIGUIN ANG AGRESYONG US AT ANG TODONG

KONTRA-REBOLUSYONARYONG DIGMA NG REHIMENG MACAPAGAL-ARROYO!

**3** Talon Vision 2002, Umaani ng Pagtutol ng Mamamayan ng GL; Talon Vision-02

Clearing operation, Puminsala sa Kabuhayan ng mga Katutubo

**4** Kauna-unahang ED Fest sa Bulacan, Inilunsad;

Pagpapatalas sa Base-Militar ng Kano, Ginunita sa GL

**5** Rebolusyong Agraryo sa Timog Zambales, Sumisigla

**8** Itigil ang Importasyon ng Bigas at Ipaglaban ang Makatwirang Presyo ng Palay at Bigas!

**10** Balita sa Larangan

## Talon Vision 2002, umani ng pagtutol ng mamamayan ng GL

“HIGIT pa sa bagyong Gloria ang dala ng “Talon Vision 02” sa Gitnang Luzon”, ito ang mariing ipinahayag sa magkasanib na kilos-protesta ng KMP at AMGL noong Oktubre 22 sa harapan ng Clark Air Base, Angeles City, Pampanga.

Hindi pa nga nakakabangon ang mamamayan ng GL sa pinsalang dulot ng mga bagyong Hambalos at Gloria ay dumating na naman ang panibagong “kalamidad” sa ngalan ng mga manggegerang tropa ng Kano. Ayon sa tagapangulo ng AMGL, “imbes na aksayin ang milyun-milyong piso mula sa kaban ng mamamayan sa walang kabuluhang (highly unacceptable) balikatan at militarisasyon ay ilaan ito para suportang agrikultural, pagkain, gamot, pabahay at iba pang serbisyo-sosyal na kailangan ng

mamamayan ng GL at ng sambayanan sa pangkabuuan.”

Mahigit sa 600 na raang tropang Kano ang dumating at nakatakdang magsagawa ng 2-linggong magkasanib na pagsasanay-militar sa Luzon. Partikular sa Gitnang Luzon, ookupahin ng pagsasanay ang Clark Airbase sa Angeles, Pampanga, ang Fort Magsaysay sa Nueva Ecija at ang Crow Valley sa Capas, Tarlac. Ang ilang bahagi ng Tanay Rizal at sa Marine Base sa Ternate, Cavite ay paglulunsaran din ng naturang pagsasanay.

Tiyak na magdudulot na naman ito ng mga bagong tala sa mahabang listahan ng karahasan, paglapastangan sa mga karapatang-tao at paggambala sa kabuhayan at buhay ng maraming mamamayan. *H*



## Talon Vision-02 *clearing operation,* puminsala sa kabuhayan ng mga katutubo

HINDI nailabas ng masang katutubo sa mga baryo ng Paludpod, Hacienda, Buwag at Baksil ang kanilang mga kalap na produkto sa kabayanan at hindi na rin nakapamilya ng kanilang mga pangangailangan nang pagbawalang silang lumabas ng PNP noong gabi ng Oktubre 11 hanggang hapon ng Oktubre 12. Sapilitan ding hinalughog ng mga pulis ang ilang bahay at sinaktan ang ilan habang kanilang ini-interogeyt ang mga taumbaryo kabilang ang *tribal chief* ng lugar. Hanggang Oktubre 13 ay hindi na rin nakapangalap ng mga produktong gubat ang mga katutubo bunga ng pangamba sa pandarahas ng mga nag-operasyong tropa.

Mahigit 60 kataong tropa ng PNP ang naglunsad ng *clearing operations* sa saklaw ng San Marcelino at Botolan ng Zambales nitong Oktubre 11-15. Ang mga naturang lugar ay bahagi ng maniobrahan ng mga sasakyang panghimpapawid (mga helicopter, jet, eroplano) sa inilunsad na Talon Vision-2 o magkasanib na operasyon ng mga tropang Amerikano at AFP na ikinukubli sa bansag na “pagsasanay”. *H*

## Kauna-unahang Educational Festival sa Bulacan, inilunsad

MATAGUMPAY na naidaos ang kauna-unahang pamprobinsyang Education Festival (ED fest) ng mga militanteng organisasyong masa sa Bulacan nitong Setyembre 21 hanggang 25. Pinangunahan ito ng Center for Environmental and Developmental Studies, Inc.

May temang “Pataasin ang Panlipunang Kamalayan, Mag-aral at Makibaka”, ang limang araw na ED fest ay dinaluhan ng mahigit 70 delegado mula sa iba’t-ibang sektor.

Ayon sa lupong nangasiwa sa programa, ang ED fest ay inaaasahan nilang magiging mitsa sa tuluy-tuloy na paglulunsad ng mga pag-aaral at pagsasanay na magluluwal sa paparaming instruktur sa hanay ng iba’t-ibang sektor.

Kabilang sa mga kurso at paksang tinalakay sa ed fest ay ang mga sumusunod:

1. Pambansang kalagayan at suliranin ng mga sektor ng lipunang Pilipino
2. Pamprobinsyang kalagayan ng Bulacan

3. Pagsasanay ng instruktur - ang pambansang kalagayan
4. Kasalukuyang kalagayan ng magsasaka at mangingisda
5. Kasalukuyang kalagayan ng kababaihan
6. Kasalukuyang kalagayan ng kabataan
7. Ang Kilusang magsasaka at tunay na reporma sa lupa
8. Usaping pangkapaligiran
9. Hinggil sa globalisasyon
10. Hinggil sa tunay na unyonismo
11. Ekonomya ng Pilipinas
12. Pagsasanay sa sining — teatro, awit, biswal, brodkasting

Anang isang tagapagsalita, “marapat na higit nating mapangahas na itaas ang kamulatan ng papalaking bilang ng mamamayan sa ating probinsya. Ito ay sa gitna ng kasalukuyan nating kalagayang pinaigting ng Imperyalistang US ang panlalansi, panghihimasok at direktang pananalakay sa hanay ng mga lehitimo at progresibong organisasyon at sa mamamayan.” *H*

---

### *Pagpapatalsik sa Base Militar ng Kano, Ginunita sa GL*

“ISANG PANANDANG BATO ang araw ng Setyembre 16, 1991 para sa mamamayang Pilipino na walang pagod at takot na nakibaka para sa pagpapaalis sa mga tropang Kano noon sa bansa.”

Ito ang ipinahayag ng tagapagsalita ng Bagong Alyansang Makabayan-Gitnang Luzon sa ginanap na martsa-rali sa harapan ng Clark sa Angeles City nitong Setyembre 16 bilang paggggunita sa pagpapatalsik ng mamamayan sa mga baseng militar ng Kano sa bansa at pagpawalang-bisa ng Senado sa US-RP Military Bases Agreement. Aniya pa, “hinahamon muli ang nagkakaisahang lakas ng mamamayan upang labanan ang mas tumitinding panghihimasok at digmang agresyon ng Imperyalismong US sa bansa at sa iba pang mga bansa sa daigdig.”

Sa mahabang panahon ay simbolo ang mga base militar ng kano ng pandarambong at panunupil ng Imperyalismong US sa bansa. At sa mahabang panahon din ng pakikibaka ay naibigay ng sambayanang Pilipino ang isang nakamamatay na dagok laban sa Imperyalismong US nang matagumpay nitong mapalayas ang mga tropang Kano at lisanin ang kanilang base.

Samantala, buong kataksilang pinapahintulutan ng rehimen ni Macapagal-Arroyo ang walang habas na pagsasamantala at pang-aapi ng Imperyalismong US sa mamamayang Pilipino. Higit kailanman, ay nasa sambayanang Pilipino ang kapasyahan at kakayanang biguin ang tumitinding digmang agresyon ng Imperyalismong US at patalsikin kundi man biguin ang ambisyon ng rehimeng GMA na manatili sa poder. *H*

## Rebolusyong agraryo sa Timog Zambales, sumisigla

**A**ng paglulunsad ng masiglang rebolusyong agraryo (RA) at iba pang kampanyang antipyudal ang susi sa masiglang pagkilos at pagtataguyod ng mamamayan sa armadong pakikibaka na isinusulong ng Bagong Hukbong Bayan o New People's Army (BHB o NPA) sa kanayunan. Ganito ang kongkretong karanasan ng BHB sa pagrekober sa Timog Zambales na dating binansagan ng mga rebisyunista't bandidong pangkating "Rebolusyonaryong Hukbong Bayan" (RHB) na "sementeryo ng hukbo".

Mula huling bahagi ng dekada sitenta, matapos ang sunud-sunod na pagkadurog ng yunit ng hukbo sa mga depensibang labanan at sadyang paglason sa isang sandatahang yunit propaganda (SYP) ng napwestuhan, hindi na muling nabalikan ang erya. Idinulot ito ng mga naging kahinaan sa panlipunang pagsisiyasat, gawaing masa gayundin sa kahinaan sa paglulunsad ng RA. Mula noon, ang tungkol sa NPA ay naging kwento na lamang ng mga matatanda sa bagong salinlahi na sabik makakita ng hukbo.

Pebrero 1999, matapos ang dalawang dekada, saka lamang muling nabalikan ang erya. Kulang dalawang buwan pa lamang muling nakikilusan ng hukbo ang erya pero sumingaw na ito sa pasistang kaaway. Kaya naglunsad ang kaaway ng malawak na operasyong militar sa walong bayan ng Timog Zambales. Naobligang pansamantala munang iwan ng SYP ang ilang baryong nakikilusan at harapin ang gawaing pagpapalawak at pagkokonsolida sa iba pang mga baryo.

Baon ang mga lagom na aral sa karanasan ng mga naunang pagkilos, muling kinilusan ng SYP ang matarik na kabundukan ng

Timog Zambales noong Mayo 2000. Sa maikling panahon, ang lugar na tinaguriang "sementeryo ng hukbo", ngayon ay isa nang hindi matutuyuang balon ng magigiting na pulang mandirigma at kadre sa hinaharap. Sa maluwig na kalaharan (lugar na nilahar) nito ay nag-uumpisa nang dumaloy ang mga tagumpay ng mga pakikibaka at RA na inilunsad ng mamamayan sa pamumuno ng Partido Komunista ng Pilipinas.

### Patuloy na umaani ng tagumpay ang patakaran hinggil sa mga pakawalang hayop

Sabunganay (pagkuha ng puso) at pagtanim ng saging, mais, kamote at gabi ang kabuhayan ng mga katutubong Ayta at Zambal na naninirahan sa gilid ng kalaharan. Ang isang sakong puso o isang sakong gabi o mais ay pinagpapalit nila sa isang salop na bigas at isang pares ng kape't asukal.

Kinakain ng mga pakawalang baka at kalabaw ng iilang panginoong maylupa at mayamang magsasaka ang kanilang mga pananim na saging, gabi at kamote. Maging mga punong amukaw (saging na butuhan) na pinagkukunan nila ng puso ay di rin pinapalampas ng mga pakawalang hayop na ito. Maluwang at mataba ang lupa sa gilid ng kalaharan pero hindi nila lubusang mapakinabangan dahil sa nabanggit na mga hayop.

Matagal nang problema ng may 200 pamilya ng katutubo na naninirahan sa limang sityo ang pagkasira ng kanilang pananim. Matagal na nilang inirereklamo ang pamiminsala ng mga pakawalang hayop pero hindi sila pinapakinggan ng mga may-ari ng hayop at maging ng konseho ng barangay. Kung kayat para mabuhay lang ang pamilya, kalakhan sa kanila ay lumikas



sa matataas na lugar na di kayang marating ng mga baka't kalabaw. Pinagtiyagaan nilang linisin ang masusukal na dalisdid ng bundok para pagtamnan ng saging, kamote at gabi. Pinagtiyagaan nila ang layo ng pinagkukunan ng puso at makakain samantalang nagpapakasasa ang mga pakawalang hayop sa nilisan nilang gasak o kaingin.

Sa pag-oorganisa ng BHB sa mga taumbaryo, napukaw ang kanilang mapanlabang diwa at nabigkis ang mahigpit na pagkakaisa sa pagharap sa problema. Mula sa mga reklamo at mungkahi ng masa sa limang sityo, nakapagbuo ng patakaran hinggil sa mga pakawalang hayop. Ang patakarang ito ay kumikilala sa karapatan ng sinuman na magkaroon ng alagang hayop habang kinikilala niya ang karapatan ng mga magsasaka na makapagtanim at pakinabangan ang kanilang pinagpaguran.

Ipinagbawal ang pagpakawala ng hayop o pagtayo ng rantso sa mga lupain na may pananim o pwede pang pagtamnan. Ang mga may-ari ng hayop ay binigyan ng makatwirang panahon para makapagbakod o mag-ayos ng bakod. Kailangan nilang isangguni sa mga taumbaryo kung saan sila pwedeng magbakod. Pagkatapos ng itinakdang panahon, ang mga baka o kalabaw na wala sa loob ng bakod ay huhulihin o babarilin ng hukbo at masa. Gaya ng nangyari sa alagang baka ng isang panginoong maylupa na hindi sumunod sa patakaran.

Matapos ang tinakdang petsa para magbakod ang mga may-ari ng pakawalang hayop, nagmartsa sa kalaharan ang may otsentang magsasaka mula sa iba't ibang sityo kasama ang isang iskwad ng hukbo. Ang mga lalaki, babae

at mga bata ay may dalang mga itak, sangkalan, kaldero at asin. Organisado nilang tinukoy at binaril ang baka ng panginoong maylupa na nadatnan sa kalaharan. Tulung-tulong din nilang kinatay at pinaghatian ang karne ng baka. Sa tuwa ng iba, pinatuyo pa nila at iniwi ang ulo ng baka sa kanilang sityo.

Sa ngayon ay nag-uumpisa na ang mga bayanihan sa paggasak sa gilid ng lahar. May ilan na ring nakapagsabog-punla ng palay. Tinatamasa nila ngayon ang bunga ng kanilang sama-samang pakikipaglaban. Natuto na ring makipag-usap sa kanila nang pantay-mata ang ilang mayamang magsasaka at panginong maylupa sa lugar.

Ang patakarang ito ay lumaganap at pinapatupad na rin ngayon sa ibang baryo sa loob ng larangan na may kahalintulad na problema. Patuloy itong umaani ng tagumpay.

#### **Pagtataas ng sahod, naipatupad**

Sa paraan lamang ng kolektibong paglaban matatamasa ng masang anakpawis ang kanilang mga lehitimong karapatan. Totoo ito maging sa mga proyektong inilulunsad ng mga institusyon o Non-Government Organization (NGO) para diumano sa kapakanan ng mga magsasaka sa lugar. Isang halimbawa nito ay ang karanasan ng 100 manggagawang bukid sa isang pataniman na proyekto ng isang institusyon. Para maitaas ang kanilang sahod mula P100 hanggang P120 kada araw ay kinakailangan nilang kolektibong igiit ito sa mgalider ng institusyon. At nagtagumpay sila.

"Salamat sa NPA," sabi nila. "Itinuro nila sa amin kung paano magkaisa at ilaban ang aming karapatan para tunay na maging kapaki-pakinabang sa amin ang proyektong ito."

**Sa  
pag-oorganisa  
ng BHB sa mga  
taumbaryo,  
napukaw ang  
kanilang  
mapanlabang  
diwa at  
nabigkis ang  
mahigpit na  
pagkakaisa sa  
pagharap sa  
problema.**

